

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu Naalakkersuisunut kaammattuutigaa aalisarnermi ilinniartitaanerit eqqarsaatigalugit nunat akornanni suleqatigiinnissamut periarfissat misissoqqullugit.
(Aallartitanut siulittaasoq Vivian Motzfeldt)

Akissuteqaat

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Siullermeerneqarnera

Naalakkersuisut Nunat Avannarliit Killiit Siunnersueqatigiiffiata kammattuutaanut nr. 2/2017-imut isumaqataanissaannut siunnersuummut Naalakkersuisut qujaniarput.

Aalisarnikkut inuussutissarsiorneq Nunatsinni inuussutissarsiutini pingaarnersaavoq. Taamaammat aalisarnerup ineriartortittuarnissaa nalimmassartuarnissaalu pingaaruteqarpoq. Tamannattaaq nunanut avannarlernut killernut allanut atuuppoq, nunammi taakku aalisarnermik inuussutissarsiuteqarnermi periarfissat tamakkiisunngortinnissaannik ineriartortinnissaannullu soqutigisaqarluartuupput.

Aalisarnerup iluani ilinniarneq kinguaariinni tullinnguuttuni aalisartut piniartullu aalisarnermik inuussutissarsiuteqalersinnaanissaat anguniarlugu ineriartorteqqinneqassaaq, aalisartullu tamanna aqutigalugu inuttut ineriartornissaat aamma anguniarlugu. Aalisakkanik tunisassianik suliareqqiisarneq, tassanilu tunisassiornermut atortut siuarsarniarlugit kiisalu nerisassatigut annermik ataqatigiittoqarnera pilersinniarlugi tulluarnepaajussaaq suleqatigisanik allanik tamakkunatigut aamma soqutigisalinnik ilisimasalinnillu suleqateqartoqarpat.

Ilinniarnerit aalisarnermut attuumassutillit ilinniarnernut arlalinnut allanut kiisalu ilinniarnikkut qaffasissusilinnut arlalinnut siammarsimapput.

- Meeqqat atuarfiat
- Inuussutissarsiutitigut ilinniartitaanerit
- Ilinniarnertuunngorniarfiit
- Sivikinnerusumik ingerlaqqiffiusumik ilinniarnerit
- Sivisuumik ingerlaqqiffiusumik ilinniarnerit

Taamaammat periarfissanik misissuisoqarnerani aalisarnerup tungaatigut ilinniarnermut tunngatillugu suleqatigiinneq sumut inississallugu tulluarnepaajussanersoq aamma pingaartittariaqarpoq.

Naalakkersuisut aalisarnerup iluani inuusuttut ilinniagaqalernissamik soqutiginnilersinniarlugit sulissuteqarput. Tamatumani pineqartunut ilaapput tunisassianik tunisassiorneq kiisalu aalisariutini kalaallinik aqumiunik ilinniartitsineq.

Massakkorpiaq DTU suleqatigalugu tunngaviusumik tunisassiortutut ilinniarnep aamma Diplomingeniøritut Fiskeriingeniøritullu ilinniarnep pilersinnissaat sulissutigineqarpoq. Diplomingeniøritut aamma Fiskeriingeniøritut ilinniarnep atillugu pilersaarusiornerup

nalaani Nunani Avannarlerni Killerni ilinniarfinni nammineq toqqarlugu pikkorissartitsinerit aqputigalugit paarlaaqatigiissinnaanermut periarfissat aamma misissorneqassapput.

Aamma Atlantikup Avannaani Ilinniarnertuunngorniarneq pillugu Kalaallit Nunaat, Savalimmiut, Island aamma Danmark akimorlugit misiligutitut suliniummik pilersitsisoqarnialerpoq. Atlantikup Avannaani ilinniarnertuunngorniarneq inuusuttunut inuiaqatigiinnut atlantikup avannaaniittunut aamma uumassusilinnut ilisimatuussutsikkut sammisanut ilisimasaqarusuttunut piginnaasaqalerusuttunullu sammititaavoq. Ilinniarnertuunngorniarnarluni atuaqatigiinnissaq august 2019-imi aallartittussatut neqeroorutigineqassaaq.

Suliassaqarfimmut tassunga ilisimasanik avitseqatigiittarnissaq ilisimasaqalernissarlu Naalackersuisunut pingaartuuvoq, tamannami nunavut akimorlugit inuussutissarsiutinik nalilinnik pilersitsiffiusunut ataatsimoorfiummat.

Taamaammat aalisarneq pillugu ilinniartarnernut tunngatillugu Savalimmiut Naalackersuisuisa aamma Islandip Naalackersuisuisa akornanni suleqatigiinnissamat periarfissat misissoqqullugit Nunani Avannarlerni Killerni Siunnersuisoqatigiit kaammattuinerat Naalackersuisut isumaqatigaat.